

峴嶠山房詩集

此余壬子迄丁卯所作也或家塾課

道途記游

之什大半書之計簿餘紙挾雜數冊

作輟不常

弗記時日泊丙辰通籍木天多暇吟

事倡酬歲

日旣積紙墨遂多今年秋奉

命備兵甘涼行有期矣舊時情懷歷歷在目刪削再三不忍遽擯因略加排比錄成八卷共存五百四十三首爲峴
嶠山房詩集初編非敢卽謂定本爰姑以數年蹤跡少存
梗概云尔時同治六年十二月識於宣武城南之峴嶠山
房洪洞董文渙研樵甫

峴嶠山房詩集初編目錄

卷一

古今體詩八十八首

卷二

古今體詩五十七首

卷三

古今體詩八十三首

卷四

古今體詩五十七首

卷五

古今體詩五十七首

卷六

古今體詩七十一首

卷七

古今體詩六十一首

卷八

古今體詩六十九首

峴巖山房詩集初編卷一

洪洞 董文渙 研樵

壬子

春不雨

黃雲漫天吼庭樹塵沙滾滾吹煙霧白日慘澹晝無光驚
飈市地猛於虎山川條條青天紅長劍何人割乖龍千家
作社賽社公社酒不治公耳聾客歲三冬久無雪田園龜
坼凍欲裂宿麥漸枯草不生涓滴泉源旱將絕卽今時已
過清明田家日日望雲生莫歸天邊霞起燒晨出枝上鳩
呼晴昨夜軍書走旁午縣吏催征已到戶東家生子十餘

歲己被徵呼入官府阿父對我涕潸然犁鋤典盡輸官錢
府帖又下催征豆更賣黃犢寬朴鞭我聞此語若有失仰
視西飛送白日歸來倚戶不成眠明月皎皎又東出

礪行

溪谷無人行幽草隨意綠小橋流波渾昨夜春雨足

喜雨行

豐隆擊鼓聲逢逢潛蛟夜泣馮夷宮馬鬣一滴幾千里裂
帛驚破天門紅乖龍耳斷愁不寐龍公行雨鞭龍背龍怒
挾水水羣飛灑向長天亂空墜萬瓦聲喧風轉急夜半池
鱗學人立夢中似覺蜥易愁暗裏如聞旱魃泣回首天地

忽低昂千星萬宿收光芒蘊蘊而暑熾熾旱片時已入無
何鄉披衣倚戶長太息才信天功勝人力遙看穎粟粘天
稠已覺倉箱敵山積白首老翁相勞苦大巫迎神小巫鼓
里長家家斂社錢明朝牲酒祠猫虎

游龍子祠絕句

清溪路盡只桃花茅舍無多逐岸斜偶趁樵風忘路遠眼
隨飛絮過鄰家

雨後南崗列翠屏嵐光濃染佛頭青荒煙日暮人家隱鐙
火山腰點碎星

冷泉關

石骨巉巖聳翠巒衝寒曉出冷泉關朝來漸喜征輪穩臥
看汾西一帶山

漢槐歌

介休縣西郭林宗墓前地名漢槐關

有道人去二千載荒阡尚識中郎銘古槐偃蹇誰所植孤
高忽欲摩蒼冥重雲陰晦不知晝老幹屈鐵相枝撐山魃
木客頻窺伺劫火不入神所憑我來正值槐黃節落花滿
地涼飈生古碑摩挲三歎息霜雪剝蝕落蘚青憶昔赤劉
庾陽九乾坤流血興戰爭五陵風雨走狐鼠蕭蕭棘艾銅
駝鳴華表凌霄一千尺長繩曳倒埋榛荆大官瑩域歎蕭
瑟佳城往往飛鼯鼯天陰月黑翁仲語山鬼吹火燐熒熒

此槐巋然能存世髣髴猶覩先民型想當清流禍初起黨
錮羅織盡盛名公與此槐甘棄置一木難支大廈傾空山
久老梁棟材槎枒不顧俗眼驚過客湛唫聊駐馬荒祠謁
拜心忤忤召公甘棠頌遺愛尼山古檜如神明遺蹟千秋
不忍泯護之何啻敦盤鋤歲月茫茫人事改白馬甘露局
幾更槐音忽起聲滿耳高風尙見先生清

過四大天門

巨鎮分燕晉崔嵬天與齊俯臨平野闊高壓亂山低崖轉
方無地雲登忽有梯蹇驢愁石路繭足一攀躋

山行絕句

朝亦行青山莫亦行青山青山長不改行人自往還

溪行

千山落木閭荒溪衰草無情自止隄孤影一鞭驢背穩斷
冰流過小橋西

癸丑

古意

浮雲無根蒂游子何時還千里莫相思悠悠阻河關門前
楊柳枝嫋娜隨風彎秋風一蕭瑟太息未忍攀夕陽空有
影不照眼中山皓月空有魄不是夢中環晦朔感芳序光
景無時閒長恐繁華謝明鏡凋朱顏朱顏不可照時時淚

痕斑芙蓉渺難致素浪空潺湲願因託鴻鵠寄志青雲間
纏綿終不渝豈惜心力孱

西郊晚雨

日落諸峰暝遙天暮色昏山光迷遠郭雨氣隱前邨路長
新落點池過舊漲痕誰家啼墓側故故斷人魂

小游仙

瓊巖露乳結丹房碧玉凝流石髓香祇恐再來終化石東
方容易得偷嘗

活火頻添玉炭紅常教毛女運虛風丹成不倩靈符護偃
月鑪開鼎已空

寶笈龍威索解難乞將眞詰惱仙官瑤函堆盡堯年土教
覓靈湫洗眼看

淮南雞犬性通靈雲裏生兒已換形翻笑茅君甘憔悴長
年低首問丹經

雨後訪王願齋

軒

孝廉丈

荒郊新雨後馬迹破苔痕初日藹長薄疏煙失遠邨水邊
童指路樹裏寺藏門料得新詩就還應共醉論

筱園消夏絕句

曲折迴廊一徑開濃陰低護破蒼苔空林鳥散煙中影知
有游人隔雨來

石橋壓檻覆晴虹
鏡裏垂楊裊碧空
山雨忽來春漲滿
亂花流浪出牆東

山泉帶雨咽鳴瀉
濯盡輕泥草似袍
燕子不來鶯又去
四山熟徧野櫻桃

墨暈輕圓漾碧漪
落花紅蘸碎琉璃
偶然幻出光明錦
正是先生洗硯時

花外樓臺傍夕曛
畫簾高捲待歸雲
西山日落東山雨
來日陰晴定幾分

晚登鳴琴樓

木落水歸壑
風高客倚樓
醉看紅葉老
興逐白雲幽
山影

山嵐上房言多卷之二
經霜淡河聲挾雨秋那堪增別恨天外認孤舟

癸丑除夕

守歲猶斯夕今生信偶然春歸兵燹後年長亂離邊幾日
風煙息誰家骨肉全因人聊自慰吉語喜駢聞

甲寅

郡寓過顧齋丈飲約爲姑射之游

春風花發蝴蝶飛翩翩公子金作衣主人有酒勸我醉清
明煙樹愁芳菲彈指光陰一百五小院香雲溼紅雨對月
且飛太白觴催春又報花奴鼓鷓鴣絃檀板漫銷魂丁甯燕
子語黃昏有約看山且須去明日青溪漲前渡

睡起

風清小院淨塵沙寂寞蜂王報早衙
短榻和衣春夢醒半窗初日上梅花

雨霽喜柴緣巖

友芝

農部同年見訪

山邨夜半轉輕雷傍曉陰雲次第開
小院當風垂弱柳空庭背日長新落
衝煙鳥下池邊樹
蹋雨人登竹裏臺
春去春來空自惜且聽鶯琯對銜杯

河東道中書壁

野店爭投宿荒城暫息裝
秋風催短夢斜月挂頽牆
饑鼠窺鐙暗寒蛩咽露長
車聲何處起知爾若爲忙

郊行口占

西風吹白沙衰草連天綠羣鳥驚忽飛時有牛羊牧

早行

月落霜寒路欲迷疏星歷歷曉雞啼青山缺處炊煙起知
有人家隔水西

山居夜讀

村居久歲時遁迹同麋鹿豈不念蕭岑聊自愜幽獨禮數
忘形骸耕樵溷僮僕籬菊方著花鄰酤及時熟帶霜摘溪
毛晞露爨窗竹雖非太常齋三月食無肉我稼已登場行
樂方自卜歡焉喜夜長開卷自課讀蟲語吟落砌鐙昏出

破屋豈必仙外人無事卽清福

乙卯

曉發靈石

披衣乘曉月驅馬亂山根古嶼如迎客荒城不勝邨星含
晨氣動河帶夜聲渾詰曲灘前路雞鳴倍斷魂

亦吾廬消夏絕句

火雲飛出翳晴空日射庭榴血色紅過午客來聞鳥喚不
知人在百花中

水閣清閒晝敞關曲屏臥倚看雲還南風繞檻花如火紅
盡廊西一帶山

池邊風柳亂鳴蛙
萬樹晴分落照斜
雨後殘雲不歸去
飛空一色盡成霞

晚涼池上月
初晴露滴芙蓉響
有聲昨夜移尊花下酌
醉歸猶覺夢魂清

客感

旅館三秋客
端居百慮違
潘安空舊感
王粲尙人依
病葉燈前落
癡蠅酒外飛
何時嶺頭月
照我故鄉歸

秋夜苦雨

搖落秋爲氣
淒涼夢易驚
蔦聲風處急
螢火雨邊明
夜永消詩債
寒深借酒兵
幽蛩何太苦
也作不平鳴

歸家

驛路揮鞭急離亭憶舊過喜聞鄉語近漸覺故山多斜日
寒桑柘西風動黍禾歸雅一枝穩棲息自庭柯

汾上晚步

徑轉荒蹊窮清流自迴抱野橋當岸平白石初通道離離
禾黍稠點點菰蒲小木葉下寒山雲中見歸鳥鐘聲古寺
深塙影涼波繞老稚依柴門牛羊下來早前溪忽破煙人
語入深宵欵乃不成曲悠悠來遠棹

丙辰

晚宿

寒雅噪空林啞啞作人語天外落殘霞甯山湧無數時見
邨墟中鐙火自來去

井陘道中

三家茅舍自成邨處處垂楊傍石根野水烹茶香味減破
窗補紙墨痕存時平驛路無全堠地僻人居盡短垣借問
淮陰征戰事千年成敗更誰論

曉發正定

漠漠平沙遠滔滔旅客過河聲連督亢月色冷滹沱雞犬
經時少乾坤寄慨多酒徒何處覓倚劍獨悲歌

秋夕

小閣鐙殘夜氣清
紙窗斜月轉三更
年來怕作悲秋句
夢醒蕭蕭絡緯聲

古意

郎家溪水南
妾家溪水北
一夕風雨生
溪水深不測

范陽道中

籃輿穩似坐
風帆窗外煙
纔次第
諸一路青山如夢裏
秋風秋雨宿燕南

山行雜詩

山花發深紅
繞磡紛無數
閒谷寂無人
白雲自來去
曉起不知寒
晨氣溼衣碧
石橋蒼苔淺
時見人行迹

薄莫下絕磴笙簧十餘里渡口無遠近只此一條水

固關

絕頂風回萬壑哀羣峰落日起黃埃嵐光向夕添深翠樹
影經秋長綠苔怪石如生當路立青山作別喜人來將軍
祠廟空搔首今古銷沈幾伯才

關上有白面將軍祠相傳
趙守關將爲淮陰侯所殺

并門客寓題壁

偶向雲山寄此身空王梵唄聞昏晨僧要下榻留行客犬
解迎門戀去人借地從知闕福命出山亦自悔風塵何時
頂禮蓮花座餅鉢重來了夙因

丁巳

芳華怨

清明十日狂風惡桃花開徧杏花落獨夜閉門庭草深淒涼夢醒聞檐鐸鐸聲清急朱窗曉自繫金鈴護香早空裏游絲百丈高畫中長笛一枝裊此時有人初倚樓此間何人能遣愁夜雨雕梁燕背溼斜陽巷陌鶯簧流流鶯嘯罷青春莫碧艸黏天望遠路恨入苾蘿湖上邨愁生桃葉江南渡聞道嫖姚不爲家休將搖落怨芳華流光一擲紅顏改依舊春風滿院花

古陶夜行

鳥雀空林噪關河倦客情溪雲攬馬過山月向人行旅夜

依童僕離懷寄友生鄉郊歸思迫幾度問前程

曉行

地僻稀人迹溪清減水痕
櫻花紅夾路芋蔓紫連邨
買酒寒沙市呼茶野寺門
卻隨樵徑遠渺渺散雞豚

書齋卽事

輕香一盃碾冰輪坐倚桐陰攤飯勻閒砌半埋幽長蘚小
庭新掃淨無塵龍孫斗茁常驚鶴魚子才生便畏人夢醒
不教鸚鵡喚爭知客去未含曠

手卷珠簾待燕歸空梁波影漾清暉和煙蕉露晨侵徑帶
雨松雲夜欵扉柳榭風迴山月悄荷塘霧老石苔肥蜻蜒

不向花間度故上琴臺點客衣

東雍道中

過雨溪流冒漲痕野航爭向渡頭喧寒雲繞舍全遮樹亂
石平堤欲到邨問路僧歸煙外寺買花人語水邊門短衣
孤劍長安客落日蕭條正斷魂

涑水途次書懷

夾堤楊柳曉霏微野曠天低水四圍風截亂雲穿日度鳥
呼殘雨趁煙飛計程幾日還鄉切作事頻年與願違辛苦
寃禽成自悔何時終息漢陰機

晚行

四山月言集卷之二
二
向夕炊煙合寥天望不分
礪虹留返照溪水印殘雲
破廟寒狸出遙邨
莫雁聞自多搖落意木葉
況紛紛

山店題壁

村酒無香濺齒酸
黃芽綠韭足朝餐
蕭疏野味堪同飽
值得先生苜蓿盤

秋草次顧齋丈韻

無邊寒草接荒塘
染盡芊緜一片長
斷港蟲吟晨吸露
空山馬齧夜嘶霜
客愁舊憶江南碧
旅夢新添漠北黃
莫向英雄歌敕勒
平沙幾處臥牛羊

戊午

踏青曲

深閨楊柳傷春莫盡日空庭怨飛絮三三五五行采桑腸
斷西陵踏青路淺綠初扶油壁車軟紅欲浸淩波步背人
擁髻暗自憐漠漠嘶痕溼鮫素雕鞍繡幃誰家子寶馬如
龍如流水腰間鞭動衝隊過袖裏丸拋逐塵起青天風急
鷗入雲一笑飛鳴半空墜肯將肘後懸金印但博樓頭啟
玉齒老將年年久離別窮邊遠戍那能撤萬人出塞一身
存百戰功成短兵折草中狐兔何須問當道豺狼幾時滅
可憐頭白偏裨中征衣浣盡沙場血

絳州道中車上口號

迢遞東雍路風清緩馬蹏鐘聲煙柳外鳥語竹林西地轉
長河曲天隨落日低高城春在望聊復解輕齎

山行偶占

畫裏垂楊隱翠屏遠天樓閣入煙冥晚峰工設斜陽色林
外剛添一角青

行次靈石

雨路行無次山程日易曛孤城背寒水壞堞補疏雲落葉
如相戀征鴻不可聞思鄉心自醉非是酒能醺

介休道上

百里平原未見山人家遙隔柳陰間連耒聲裏人相喚原

上秋風碌碌閒

秋夜曲

芙蓉塘上秋風老
海雲碧溼鴛衾早
美人夜坐數燈花
手剔蘭缸落紅小
魚書珍重頻開封
卜徧金錢夢未逢
別院碁聲催響急
隔簾螢火牽愁重
破曉霜鐘動還咽
庭葉驚寒打窗裂
腸斷江南瑟瑟波
魂銷天外纖纖月
剪刀初罷空掩曉
瘦損腰圍只自知
嬌憨小妹未解事
催向阿娘索嫁衣

除夕

窗送迢迢漏鐙開
豔豔花多愁憎旅
雁久客羨棲雅放
眼

春猶好驚心鬢欲華關山千里雪歸思浩無涯

己未

園寓卽事呈黃品珊廷金水部洪幼元調緯編修二同年

疏陰逐地倚繩牀散髮空庭愛晚涼竹裏夜喧溪雨急山
頭朝趁嶺雲忙白澆肥潦貪瓜長獨勵荒落呪筍香更羨
月明橋下步被風卷損釣絲長

半架茶蘼陰短棚平擎松葉結巢成池邊鳥下穿花度樹
底人來避筍行風約蟬聲高處斷雨矜山色曉來晴堪憐
一角林蘿月又向前峰缺處生

雲山別墅雜詠絕句

花木禪房倚礪成雲深無路斷人行閉門盡日聞棋子時
有鳴蟬一兩聲

樹裏昆湖夕照晴雲天倒影入空明晚霞欲落風吹合已
覺宵來雨意生

木末孤亭畫不如半年深負對門居花開可惜閒無主忽
有風來聞讀書

雨腳濃垂過礪深雲頭低覆隔山陰青山祇解供詩畫無
限蒼生正望霖

煙絲夾道碧毵毵柳鎖長隄水染藍五里荷風香不斷月
明趁影到溪南

別浦煙深萬柳絲
風前踈地不成絲
寒蟬作意秋先到
一霎飛鳴徧別枝

與品山同年夜話

叔度波千頃風流復見君
開顏忘坐久對酒過宵分
月色頻移竹溪聲不隔雲
浮生多契闊莫漫惜離羣

古朗月行

三日月初朏七月初上弦
願妾眼中月與郎一處圓
可憐一處月照人兩地眠
願妾窗前影移郎衾枕邊
新月初上鉤照妾獨自樓
願郎如月影照歡莫照愁
一月三十日月月月團圓
願郎與妾意一月一回圓

夜雨

高閣涼初至商音滿枕邊雲深雷鼓咽風急雨聲懸幾日
拋詩課長宵破醉眠那關秋士恨我自惜華年

園寓秋霽

微雨延秋來喜此涼宵永孤螢暗有輝銀河淡無影石步
防苔滑露坐掩燭靜心目得自閒塵氛若爲屏須臾耿虛
明清飈豁靈境流光更徘徊皓魄生東嶺

秋思曲

疏林漠漠長煙白一寸遙山出深碧殘紅露溼愁如雲霜
落寒塘曉無迹中婦誰家怨別情淒然月下雙笛清汀洲

芳草傷心色礎杵丹楓搖落聲旗亭握手逢春莫醉上青
驄
鵲飛絮社燕新成幾處巢賓鴻自識來時路五更風急
不成眠夜夜孤燈對卜錢吟秋況是悲秋侶不惜殘年惜
盛年

月下懷

涼風動高秋寒蛩鳴不歇落葉散如煙疏星澹欲沒萬籟
寂無聲枯坐類禪悅白露石根零青螢竹間活小池何湛
湛流泉亦汨汨頗思引長簞漸欲疏短葛嗟我同心人渺
然久秦越何因一樽酒共醉九秋月
秋晚夜讀

霧老鐘初斷霜寒櫟更長空階侵月色破屋出天光
鑪冷新培火盤殘舊爇香宵來減書課應爲校詩忙

次顧翁雨霽韻

西風下庭柯露冷衣襟溼曲徑初過雨花陰小
竚立老樹秋更鮮寒蟲晚逾急熠燿時一明菊香聞
暗襲心與靜者謀境隨愁思集浩歌詠滄浪竟夕
念簑笠

病起東品珊

臥疾劉公幹幽懷阮步兵詩情愁裏減鄉思客邊
縈未得驅窮鬼何緣乞酒盟兼旬勞慰拊甚媿故
人情

峴嶠山房詩集初編卷二

洪洞 董文渙 研樵

庚申

冰鼠篇

窮髮之北下有冰淵燭龍不照幽火不然峩峩層凌鼠生
其間蠕伏蚊息于冰是天饑則冰食倦冰于眠鼠日以大
冰日以穿大齧逾力穿逾不堅砉然冰斷真天見焉嚴風
滌拂乃化灰煙如何所託而反戕旃生性云異嗟嗟誰憐
冰天且爾矧伊冰山

碩鼠篇

碩鼠其穴于隰于畛一雄一雌晝伏宵奔嗟我粒粟禦冬
孔殷胡然成室形影遂分雌居于穴給雄出堙雄歸無所
哀鳴酸辛寒棲敗葉飢掘凍根天地久閉乃生陽春啟蟄
雌出故雄幸存曾不懷媿而反求新嗟嗟鼠輩何心未仁
視彼下石鼠心尙淳

鼯鼠篇

鼯鼠食牛糲口實甘角之觶觶爰飽爰饑豈不觶觶乃餌
以餌匪惟忘苦反嬉而恬一恬一齧用售其貪牛身如葉
鼠口如蠶繭粟有盡果腹未厭剝膚孔亟以痛厥心牟焉
長號命隨以斬嗟爾利口君子何堪履霜有始由來者漸

夫焉處之不惡而嚴

戲和沈仲復

秉成

編修同年無題八首

斗帳紅羅面面垂
香薰茉莉幾番窺
金鍼度就初傳訊
團扇歌成解索詩
牆角似曾憐宋玉
庭心未許困芳姿
東風莫受梅花聘
好待重來杜牧之

生花夢裏上齊紈
不畫將離只畫蘭
綵線慵拈和恨刺
香絨輕唾帶愁團
憂思憶汝何當覺
啼笑防人始信難
珍重他時同韻寫
好藏秋管待吳鸞

默憑繡佛祝長齡
綵盒何年更乞星
未敢買絲圖骨相
何當刺血寫心經
墨痕染淚終成碧
唾點黏香更化青
記取

三年懷袖裏空應錦字惹芳馨

稽首慈雲禮法王柳枝斜畔月東旁劇憐解語開西府只
合忘憂樹北堂蓮子結時含薏密藕根離後引絲長淮南
雞犬休相笑爭識千金自感郎

未許人間問玉京座中悵殺許飛瓊金鑪隔幔知微熱衣
鏡迎門畏大明松柏有心終結子菖蒲不識舊聞名婆娑
桂影年年見玉斧吳剛枉一生

葉渡江南夢已閒陌花開罷唱刀環眞眞別後方憐影小
小年來定損顏腸轉車輪愁萬結口生石闕語雙關大隄
闌說驚郎豔何處春眉似故山

橋梁白水認新邨，徹骨流泉井未渾。
笛裏關山疑有路，畫中樓閣竟無門。
綠珠十斛甯論價，紅豆三升別種根。
莫雨瀟瀟今罷曲，人間何處問桃源。

井落銅瓶消息微，頻年回首素心違。
但愁有地修金屋，不肯開籠放雪衣。
路到蓬山知更渺，途經弱水信全非。
那關才盡江郎筆，石見纍纍遠欲歸。

病起東譚文卿

鍾麟

編修同年

門設常關喜暫開，更無車馬破蒼苔。
雨疏庭院空花落，風寂簾櫳野雀來。
屏迹曾緣身久病，違時從信宦無媒。
兼旬厭客今思客，早晚聽音共舊醅。

聞外舅岳莘農

世仁

編修櫬歸中江慰賦

遠道經年去艱難返故居悲深翻作喜望極更疑虛入口
飄零外孤魂喪亂餘遙憐垂老淚痛定意何如

寄常子淑

學孟

孝廉

常君四十不得志蒜髮被顛神不頓愁來痛飲時問天醉
後酣歌欲斫地廿載才名涑水濱讀書萬卷思致身自信
折肱不關命那知別足非由人豪竹哀絲寫懷抱鏡裏朱
顏豈常好壯志翻從牖下消雄心竟向閒中老匹馬燕山
草初綠愛我長歌百回讀談心猶恨獲交遲話別偏驚賦
歸速別後新詩滿懷袖水驛山程無不有深藏不敢輕寄

將恐被狂名落君口豈知兩度過清明應笑狂奴誤舊盟
計程期訂踏青後隔年約負看花行己未春闈君下南宮
余以散館園居未
晤庚申君太息年年傍朱戶世事恩怨安足數瓣香漫鑄
鴟夷金卮酒空澆趙州土丈夫窮達那可必此事終期君
第一破浪乘風會有時莫使義輪坐相失

盆松篇

鬱鬱盆中松矯矯當風舞葉葉相承接枝枝相定挂青陽
發羣萌蔥蒨自媚嫵以彼千霄姿甘此玩好伍灌溉豈不
勤涓滴釋已溥焉知生性漓憔悴氣莫吐深山有孤根夜
夜听雷雨上枝巢鸞鳳下枝臥虬虎神物遇有時那許問

斤斧歸然七廟尊
丹雘作梁柱
陋被盆中質
終年依淺土
斬伐雖無憂
尺寸安足補
託根良獨難
棄置等灌莽
躁進與晚成
豈不在自取

閒趣

拂暑消長簟
高槐蔭石涼
簷花風墮影
砌草雨生香
依檻送歸鳥
尋詩倚夕陽
晚來貪靜坐
秋興漸微茫

暑夜不寐

夜暑猶妨臥
微酣已近醒
愁增嫌酒薄
目倦厭鐙青
老樹雲回擁
荒雞雨斷聽
曉涼清枕席
虛白望疏櫺

同仲復游龍樹寺納涼

市遠囂塵隔，僧寮萬綠遮。渴宜清腋茗，涼藉鎮心瓜。雨蟻封牆草，風蛛網砌花。晚晴貪待月，閒共數歸雅。

立秋

殘月徘徊入幽壑，斷續鳴西風。詎能爾天地，自秋聲。

嘲螢

卉草誠幽賤，朽枯靡所依。才能借羽翼，便欲鬪光輝。背月還爭曜，逢鐙倏暗歸。宵行何太苦，終是傍人飛。

月夜聞笛

太古峰頭月流光，此夜多何人吹鐵笛。照我發清歌，碧海魚龍醒。深山魑魅過，松聲驚伏枕。恐是洞庭波。

七夕後一日作次顧齋韻

金閣瑤階接漢浮誰云海外更無州共瞻月樹憐飛鵲還
倚星橋見飲牛靈匹何年開粉席唐宮今夕起鍼樓西風
不管乘槎客又報銀潢渡淺流

秋夜曲倣昌谷體

銀塘露冷芙蓉死零落殘紅泣秋水寒蟲弔月嘯孤煙玉
井霜飄墮梧子殘缸半燭更初闌錦衾不煖羅幃寒葉底
飛蛾撲簾入樹邊螢火排窗看金虎西流星漸沒咫尺銀
河坐超忽六籌紅豆空寄將相思浮雲渺天末

次韻和馮魯川

志沂
比部作

西來宛馬擁咸京玉帳牙旗繞郭明漢武空聞求可使噲
生誰復讓橫行天寒白草蛟龍蟄地老黃埃狐兔鳴幾日
登壇矜鼠嚇宵長鎮聽鼓鼙聲

和魯川中秋對月次韻樊問青

杉作

今夕猶傾酒他鄉怯倚樓何曾異景物只是伴牢愁河鼠
微生外淮禽大化秋唯應海西月夜夜照城頭

再疊前韻

鬪虎方當道嘯猿更上樓乾坤胡此醉風月若爲愁海闊
鯨波詭雲生雁塞秋廣寒今夜隔仙樂憶從頭

是夜微陰

庚申八月呈魯川

綵仗遠金闕，凋戈橫玉墀。猶存唐廟貌，未覩漢威儀。
落日新亭恨，秋風故塞悲。向來歌舞地，清夜走狐狸。

次韻魯川讀史東王定甫

拯

農部丈作

信有文詛楚，空聞書絕秦。受金還舉袖，料敵失望塵。
危等沈舟羽，安忘厝火薪。伊川歎被髮，誰是百年人。

詠史

師直猶如此，寇深終若何。不堪君子恐，自惜小人和。
瓊樹愁無限，銅仙淚幾多。猶聞景延廣，十萬更橫磨。

次韻和顧齋重九作

驕虜方陣守，羣公尙室操。重陽何處近，百事向來高。
雨暗

三山沒風悲萬籟豪那堪亂離恨掩淚對雙螯

秋來

落日悲羌笛西風怨漢歌心難填海盡力奈負山何魍魎
高明避英雄草澤多秋來晴霽美未改是天和

家書

知繫高堂念其如下筆難無言添慰藉何計道平安歲月
蠹三食功名鼠兩端周南尙留滯未敢棄微官

次韻和魯川詠史

奸諛覆人國匪與君父讎清流苟未殲詭計焉能售太阿
旣倒授巧矣自爲謀豈知仗鉞奮終貽青史羞九土嗟橫

潰水覆方難收反舌久無聲徒深下土憂胡公斥倫檜忠
烈邈千秋

何事

未失神亭戟俄空旅舍煙經綸書卷外涕淚酒尊前碧草
誰埋血黃圖憶拓邊齋糧方待寇何事問燕然

初冬雪夜柬魯川

葉捲風聲急雲垂雪意凝羈愁侵旅鬢鄉夢暗疏鐙園藪
青誰摘邨醪醉未能蕭條游宦味近覺冷于冰

魯川案牘甚繁而作書吟詩不輟屢蒙見示佳章仰歎才
力因倣山谷體賦贈

我於堆案愁遮眼君獨程書不告勞尚可映窗追頡頏更能閉戶寄詩騷老郎甘作龍蛇蟄壯志羞談虎豹韜永夜西堂相憶苦幸來對雪共松醪

魯川招集同人夜飲賦贈兼呈定甫丈

我生猿鶴姿無心縻好爵五載客京華是非異今昨日者海氛清風沙漸消惡置枕無石磐寄身凜冰薄所欣金石交誘我以文博古聲發春容真味出澹泊追攀久肩隨貌簡非心略君言朝簪誤余亦虛名縛近局互招赴參辰幸未各流連餞殘冬誰踟陽春腳別離寬後思談笑縱今樂論詩知曹鄴楚騷媿同作

次許海秋

宗衡

起居前輩保陽還都韻

喪亂驚初定棲遲惜暫分
逢人如世隔讀史異吾聞
地遠重重雪天高日日雲
西風不再至誰爲解紛紜

咄咄不平事書空望沈寥
賜書唐贊普開第漢嫖姚
烽火驚心數功名感髀消
時危羈薄宦徒媿鬢毛凋

我面仍黧黑君顏自渥丹
憂時唯涕淚報國有心肝
宦味齊竽濫歸程蜀道難
桃源千古隔息偃敢求安

近局聊相慰清談且當歌
仍憂鳴越甲終望枕天戈
米舊長安貴金從季子多
艱難思善後猶足補蹉跎

黃翔雲

雲鵠

庫部招集諸同人夜聽彈琴賦贈

黃君藉藉翰墨場萬卷撐胸富琳瑯七絃更以餘事將對
客手揮靜崑廊繁絃旣抑雅絃張萬籟微微鐙燭光天地
寥闊鳴孤凰太山巖巖水湯湯江月吐魄風淒霜青雀西
飛鶴東翔凋戈怒決浮雲揚楚妃流歎掩空房幽聲欲抑
迷故常 皇畿雅樂亂琶篴君獨十指生軒昂忽與古意
通微茫生平不慣識篠簞強以新曲求鏗鏘冷然使我言
欲忘亦如鄒忌善齊王薄宦悠悠天一方未免撫事增惋
傷疏越遺音猶繞梁夜夜夢到君書堂

讀後漢書

黨錮禍方熾泯芬何是非可憐陳寶輩同心兆殺機林宗

獨明哲貞隱非絕違

姑從

書城坐擁夜鐙勤百感蒼茫付暮雲
湫隘一廛猶負郭鬱陶三月倍思君
近招元亮傾新釀遠弔靈均續舊文
不爲苦吟吟更苦姑從嘲笑日紛紜

詠史二首呈綰川

開元昔全盛側席羅賢士一藝爭自效
趨躐溢帝里寄託偶失人顛倒昧治理
羣才旣已遠禍亂倉卒起萬里西孤
行偏仄歸憂死故物雖猶存陵夷自此始
冠狗坐廟堂豺狼塞四鄙

古人未達時材行已云貴拂拭上青雲竝列如目鼻草野
自珍席朝廷莫假器豈聞山郎厠茹共拔茅彙朝顏倚市
羞莫能行道避妻媵復何知多金乃高位

題傅壽毛墨竹爲比部劉子重

銓福賦

公佗畫竹老無敵二百年來那易得晚有家學承壽毛下
筆能令孤月高大者槩戟小箭橐恐有幽人坐長嘯彭城
先生購得之索我點筆題新詩我家洪厓一茅屋春晚燒
筍味甘肉惜無湖州墨妙畫作圖迴首松菊半荒蕪歸與
歸與山之陽臥聽秋籟戛官商

壽毛自題云一心有所甘
是節都不苦寥寥種竹人

龍孫復何所

次韻答仲復同年見贈作

沈君冰玉姿朝野名訇磕萬卷兀胸次蠶埃焉可雜贈言
感綢繆唾珠生歆飲時艱不假手獨醒增嗚咽君家八詠
樓後出與之合媿我漫浪者垂雲翼已塌徒勞刻宋楮忽
忽行年亦揚北昧師承率觚而酬答竭蹶持寸莛未足撼
韞韞謬回嗣宗目聯吟筮簪盍妙語寐弗諼汗顏劇蚊嚼
曹鄴君無譏小言媿諧諧

汪母吳太淑人輓詞

慕杜前輩之母

象服齊眉貴鵷班駢角成殊恩自稠疊大福備哀榮淑
德型三族傳家在一清定知含笑慰見子作公卿

濟濟眉皆白應勞 紫誥重潘輿靜不待萊綵密誰縫雨
泣金臺暗風悲石窳封惟應致身許報國付茅容

病起東翔雲

頭風愈陳琳陽氣霍枚叟沈疴六七年飲水驅之走瘡痍
遍四海和緩世不有安得斯民活借君醫國手

海秋前輩枉詩見贈賦答

渾沌鑿耳目賢愚遂殊品千載橫波頽變詭日趨甚捷足
爲上乘攀附如其寢伊誰職教化乃使此風淪中夜獨私
憂未遑安席枕時亦能高詠悲吒語驚淪惟君同懷抱言
或涕沾衽思深獨繭抽氣劇長蝎飲窮觀矢拳拳靜念懷

懔懔終傷剛直腸吾道方拾瀋違俗仕無媒避言口須噤
行年幸未徂此理可勤恁

烈婦吟

吳佳氏比部英輯五室也九月九日聞夷至闔戶手刃
二女遂自剄旌表如例魯川爲之傳

壞雲壓城烏啄屋萬轂爭門車折軸阿姑有姒念姑勞妾
計已決妾焉逃殘生幾日知難免肯使倉皇悔已晚紅絲
三尺莫羞夫盈盈更碎雙明珠烈婦殉名有如此此日鬚
眉幾人死

讀孟東野集卽柬沈仲復同年

杜陵夔後詩萬象供雕按艱危出深語百尺元龍樓千古
涪翁愛非笑今未休吾觀東野作絕鑿力與侔哀哉時命
窮潦倒不見收五十始一第偃仄死參謀半世憂樂鳴終
身肺腑愁豈其務蹇跼身心故相讎東坡寒蠶詆遺山譏
詩囚得母言之過島瘦焉足儔沈君航苦吟耳食夙所羞
余亦瓣香奉後起願從游

冬至定甫丈招集賦呈卽送行之灤陽

六氣元冥謝三光玉律迴陽從天外至坐向月邊開銅漏
移則箭金鑪撥麝灰如何對雲物祇益雜歌哀祀廢園邱
典書空太史臺南枝梅隱約北鄉鴈徘徊且縱流連樂休

嗟運序催消寒依節換解凍望春來跌宕元龍氣蒼茫賈
誼才關山明日隔莫歇掌中杯

賈小樵

瑚

編修還都賦贈

榴花始發君歸里謂言小別須臾耳燕臺臘盡君方還再
世相逢那計此君西千里客長安風塵滿日行路難羽檄
紛紛暗天地總有長鋏若爲彈問我胡爲亦憔悴殘生百
日圍城內分無奇策隨諸公但得皇天憐我輩旗亭握手
非偶然痛飲莫辭無酒錢舊友晨星半寥落君來使我忘
涕漣回首繁華夢未改車馬紅塵浩人海馬家舊數白眉
長潘鬢霜毛莫相待青衫共對淚痕多世事應歸春夢婆

廿四橋邊明月在君散館時與余共游湖橋西曹白雪憶高歌君先供職比部

除夕祭詩次願齋韻

癡獸吾分然胡爲憎一夕偶因文字愛遂託煙霞客月計
靡枉尋年新謝知白一尊酌心血慰汝長疥壁

峴嶠山房詩集初編卷三

洪洞

董文煥

源研樵

辛酉

次韻魯川元日口號

萬國朝正會依依隔歲春始和猶吉日旅進遠清塵輦道

風初息天階雪再新

是日雪

占年今第一幸早露書陳

贈朝鮮使申琴泉判樞

錫愚

徐漢山尙書

衡涓

趙蘭西編

修

雲周

銜命來青社趨班列紫宮德仍箕子舊書喜古文同正朔
星回北歸程日出東年年瞻使節迴首待春風

豈意萍輓合遂深膠漆投共球陪日下珠玉吐風流海國

三韓彥東陽八詠樓

沈仲復同年置酒寓樓邀陪末席

何當同翦燭別雨

話綢繆

僕詢歸期申君舉玉溪巴山夜雨二語爲答

魯川翔雲願齋招同琴泉漢山蘭西并海秋前輩定甫丈
小集余兄弟齋中會者十人以願齋雅集爲題海內存
知己天涯若比鄰分韻得已字

文星聚草堂斗室來千里聯翩海上彥追逐天涯士日霽
同一春地偏絕近市彬彬擘牋雅湛湛盈樽旨高文不加
點莊語時雜綺揮豪秦少游譚經習鑿齒旣叅切雲冠更
錯遊山履深恨限魚鑰無因緩螭晷論交意初愜言別情

何已夢寐應懷思悠悠謝知己

題琴泉亭

風泉自成韻不用張壁琴滌此清淨耳泠泠度雲林門前
幾曲水一曲一絃音自有成連和臨流更洗心

題漢山無阳亭

卜居無遠近心寂緣自空山林苟未靜熱客城市同聞君
厭囂闐憺怕此亭中開窗豁泉石結屋依竹松清琴閒濁
酒左右得谿風天機運日月人籟無鳥蟲浮雲自變滅了
不關寸衷一官人海裏媿我塵土客

寄題朝鮮金尙書

炳國

穎漁園亭

青山繚王城潁水溢芳甸卻出橫門道林園萬狀獻蒼鬱
嘉木合芬菲雜花絢俯檻躍聽魚鉤簾歸待燕退食鳴玉
珂雍容文字譙琴尊樂清時冠蓋集朝彥沮洳羣流趨海
波一方晏著書仁山博宣力日磬徧未覺形神勞時復事
蕭散樊籠嘆羈紲空此臨淵羨

題趙蘭西雅集圖冊後卽次原作內字韻

造物鍾情獨我輩論交遠欲尙千載忽逢海上乘槎來喜
共齋中側尊對清歡追逐弟昆行近局招邀主賓代末契
悠悠今古同如新白首餘深慨何言疏放得真賞愛我清
狂見氣概痛飲高歌兩不嫌青春白日攄肺腑江回蓬島

滄波闊迫促歸帆指鼃背觀光僑盼富交游豈敢忘君過
余愛嗜痴屢枉白雪文結好慚貽蒼玉佩他日高齋開手
書鬚眉長照畫圖內

送琴泉歸朝鮮

仙人海上來奇采耀 皇州嶽崧降韓土諧我心所求幸

側東陽席快同李郭舟高標華月出元譚劇風流探懷出

金玉

拙贈詩君
倚馬賜和

觸手虹光浮惜無瓜李報徒愧瓊琚投君

居琴泉曲

君家琴泉擅水石之勝
自言東歸後將老矣

我家洪厓幽苔岑一以

合萬里皆同儔况聞風塵倦歸計思退休君老余方壯後
會知何由東風催客夢春雨隨行軛安得雙黃鵠從君歌

遠游

送漢山

浮雲與飛鳥聚散焉可常尚書東海至

徐孝穆尚書東海人當時稱徐東海

國朝徐健庵尚書世亦以東海目之

解后文酒場懷柔異世見獻歲來

天聞雞鳴仙仗列九門洞開張雨露均中外拜起鵷鷺行

時聯贈綸雅詩卷富歸裝焉知賦別速摧我剛直腸

使臣行期

例在中和節前

紅日初東上滄波綠茫茫頗聞邊吏戒備預慎圉

疆東國近有戒心

王事焉少留翩翩決東翔詰朝發遼海輶車天

外長風波各自愛有憶徒相望

送蘭西

蘭西眞學士松雪今替人走馬金門裏釣鼇滄海濱長風
破高浪忽踏長安春光儀久心醉况接篇章新寸紙富萬
卷咳唾皆奇珍罷酒抱深喟羈懷苦未伸我曹空素食率
土慙王臣喜觀三英彥濟蹌來德鄰一交良已幸重以嚶
鳴頻天文萬里聚俯仰九衢塵良會何時再通波望析津
君歸烹尺鯉時慰情相親

次韻答翔雲

君筆氣絕世落紙縱橫如有時隘萬里變化胸臆撫余欲
範之軌匆匆暇草書鍾王百代下心畫非異間
賀海秋前輩移居次翔雲韻

開卷一室中游心千載上
晤言誰與寫
窅己忘意象芳草
盈君階天懷暢
駘蕩端居秉素履
擇里達時尙晨夕南邨
居惠來企予望

鶴有高松巢雲於孤石
生獨懷雲鶴心卜築深且明
屈曲八九步逍遙兩三楹
山光落戶內萬象回春榮
喜此遠人事好鳥時一鳴

市道紛交游浮雲更變態
吾亦憎吾廬開門萬壽對
晨車出求道莫返誰予誨
珠玉兀君胸詩書益君背
竟須日載酒從頷醺醺味

朱門貴氣多堂堂飾金塢
連牆萬里隔竟日渺河澣
願結

孟家鄰長依君子宇柴荆坐長嘯何處容塵土安得縮地
方追歡僅數武

謝仲復同年惠 御賜墨

團團蒼壁盤雙螭金章細篆文陸離日旰儒臣罷講出尙
方珍賜相追隨天家墨寶世所重半圭寸丸如玕琪人間
流落時一見大力購取靡子遺君偶得此應倍惜獨持贈
我曾不私茅屋燈寒出光怪蛟龍蹇產騰之而尋常紙筆
焉可匹波瀾倒海風雲馳惜哉潘李今不作王侯舊物廉
沽之君才嚴樂紫垣客方思珥筆爲羽儀不然名山富著
述墨妙豈繫他人司憶昨韓客有商推手筆眾口交君推

力剛古製乃同餽令我惶惑汗垂頤君今意厚重滋媿嘉
貺欲拜難爲辭卅年讀書竟何用磨墨磨誰復知脫擘
僅能記姓字揮毫敢謂師獻羲更當乞君論八法及髮未
禿濡墨池

送李恢垣

光廷

選部同年告養歸粵東

燕山二月風吹沙六出猶殘冬後花遠道苦寒柳未綠君
胡萬里脂征車曉來冰玉侈我側一一好語穿珠珈根抵
盤深元氣厚動憂四海關隆窳想當落筆渺宇內意行所
到無矜夸自言九載溷郎署拜瑱日夕趨南衙前年奉
命衛鄉國敵愾歟爲王爪牙草檄幕中風筆駛吟詩馬上

月題斜功成長揖謝大帥依舊朝轡聯京華吏部銓衡尤
慎茲積薪未免紛如麻致身報國願粗畢薦牘頻膺憂寵
加回首南天尙鞶鼓倚閭敢使行期差羣公挽留意良厚
歸計已辦隨春槎歌罷同君長太息令我心馳汾水涯周
南留滯裘葛換返哺自媿投林鴉千里潘輿勞夢寐今晨
簷鵲鳴喳喳尙念風塵倦行邁敢言祿養無遠嗟羨君此
行誠至計絕勝宦海長浮家三江口下炎紀闊春冰已泮
魚可久歸當獻壽應相憶余亦萊舞承慶嘉
翔雲枉過劇談夜分始歸次昨見示韻代柬

太山雖云高詎肯讓塵壙亦如君子門下士傾肝肺況我

異時好顧影慚襦襦他人或嘲罵勞君獎借再歛寄五字
詩披誠絕藻繪令我顏膚腴積垢快一醺願言躡驥尾安
得追鵬背晚近夸交遊白衣更變態論心實異同結念爲
憎愛君言惟余發予情亦君戴不見日三秋浹旬使心痲
追歡雲日霽契闊風雨晦跽足惠來頻忘形密坐對

題織簾讀書圖爲仲復同年賦

君家麟士隱郊坰圭竇日漏歌金聲手自織簾羞代畊緯
蕭把卷雨無停毫勤弗倦罔逸甯百代而下傳餘馨吾子
積學肇髫齡下帷廿載門常扃作圖座右如箴銘千秋儼
對先民型幽棲小屋臨迴汀樹陰結幕風清冷亦如垂簾

閉幽情西山對戶開疏櫺波影午動來遠青口哦隔簾誰
竊聽時驚歸燕落雙旌考索傳疏辨聲形意氣直與前賢
并年來視草居槐廳組織圖書爲大成珥筆再拜揚王廷
五雲簾近天語聆雛鳳他日刷翀翎更與緯史而經經
詩書日日趨鯉庭

庭榆始莢適翁叔平

同蘇

修撰同年枉過爲言太夫人嗜

此因採擷奉餽

長條萬青蚨歷歷歲其有饋貧漫不惜曾未遣奴守煮錢
莫療飢此物佐春酒持登君子盤羹茹頌壽母
庭桃盛開移時始知花下偶成

春事勤百卉庭桃已滿枝如何對零落我見嗟獨遲先時
漫不惜過景空自知轉恨芳華早何殊未開時人情有同
異大造曾無私

同顧齋市樓小飲

側身逐車塵俯首萬闌闌西山當酒樓目與長空對孤雲
低畫簷叢樹隱蒼靄天風入我衣霽日欄邊碎迢遙色界
空淨寂心境會平生九垓期喜此聽幽籟追隨得遐矚曠
邈解鈴鉢不知吏事縛始覺天宇大鐘聲下城頭鳥影落
煙外醉歸胸臆豁清月消芥蒂

題吳桐雲

大廷

中翰匹馬出關圖卽送之安徽戎幕

吳君三嵎產倜儻百夫特夙齡懷感激雅尙存孤直爲文
有根柢了不事雕飾藉甚長安名舊聞今始識邂逅詩酒
場慷慨據胸臆仗劍數千里前年走關塞東南事更殷杼
軸竭民力今行乃素志報稱從所職著借幕府籌檄磨楯
鼻墨而地軍聲遠彌天妖氛息淮南水始波皖北草如織
脫刀惜分手遠道加餐食

約翔雲遊城南

前年春色過清明萬市煙花鬧禁城眼底無愁日歡飲時
呼聯轡踏春行今年花較去年好風雨不來花自埽空庭
幾日委蒼苔古寺新來長砌草過眼繁華不可論悠悠塵

海深閉門臥聽語燕覺愁夢坐惜流鶯斷客魂城南楊柳
青堪把不共千紅鬪輕冶密葉猶能戀去人長條漸解綰
征馬明日尋君君莫違好隨游蝶弄晴暉寄語風光好相
待酣歌一曲金縷衣

題范月槎

志熙

學正年丈仕隱圖用翔雲韻

旅進來金馬端居託少微豺狐爭接迹鸞鳳自高飛白水
盟誰踐青山夢當歸浮沈樽酒裏萬事寸心違

余亦耽邱壑因君感宦游浮雲深遠道白日冷邊州警鶴
餘生在磬鴻故國秋周南成久誤欲濟念同舟

朝鮮趙秋潭

徽林

尙書惠東紙賦謝

玉唾銀光束筍收故人佳貺度溝婁曾聞解製傳鮫室豈
有添修到鳳樓九萬初分王內史百番誰似杜夔州硯田
力穡從今始天遣長年樂有秋

詠樓聯句用韓孟會合韻招同人餞朝鮮使朴獻卿

珪壽

侍郎趙秋潭申眉南

徵求

侍御宋竹陽

源奎

進士

曲高和斯寡

文

別多情愈重憶共韓客醉

秉

猶餘吟興勇

經時玉河別

渙

遠道鑒閭聳歲月芳春流

成

雲濤萬里湧

捫心慚客萌

渙

窺鏡笑塵壅諸君使繼至

成

旬日門屢踵

衣冠稀見世

渙

童叟甚登壘古貌市兒怪

成

雄文小儒恐

幸暫羈懷舒

渙

其如離緒種日接視猶欲

成

頻往念多冗

雨歇東陽樓

渙

窗臨南郭冢山禽變舊悅

成

寺柳園新寵

車馬檻前遠

渙

琴書坐中拱快值午陰涼

成

淡忘囂聲恂

光儀一室朗

渙

杖几羣賢奉談詩訂酸鹹

成

評書謝肥腫

篇章各贈投

渙

左右富抱擁玉盃抵鯨吸

成

彩筆敵劍捧

焉能效苦蠹

渙

而獨賡寒蜚言深行指迷

成

情治杖扶臚

博學愧黃香

渙

從游師王輦四海成追逐

成

一身厠闕燁

奈何歸與迫

渙

坐覺心焉悚旗亭柳可攀

成

驛路草逾茸

尊前失聘珍

渙

海外歸奇珙後會悵適越

成

前歡劇得隴

異地分疆域

渙

仙島限瀕浴人生多哀樂

成

何往非桎羣

安得小宇宙

渙

無復隔山冢況我鮎緣竿

成

思君蠶在蛹

重來儻一握

渙

初筵爲三踊律管秋冬變

成

寒毛鳥獸毳

好憑朔使書

渙

待應霜鐘雨歸帆鯨浪破

成

征棗霞采洵

渙

許萊盟孝廉同年屬題尊甫蕉陰問字圖

頡聖荆文字圖書富苑西童習而不察蒙瞽從白首許君

嗜典籍家學承祭酒有子讀父書形聲析跟肘閉戶草木

靜蕉陰親指授披圖見執卷大小儼鐘扣未識道何語趨

庭立已久將無枕中祕異聞世未有恨不入畫中疑義得

細剖問奇儻我許應門戒馬走

用山谷詩

獻卿繪懷人圖見貽賦謝

歡會豈不念泥鴻悵迴首懸知別後思歲月與之久君來
倏幾時更握臨歧手繪我懷人圖尺幅珍瓊玖蕭散得真
趣雲壑秋向後不知君家山似此畫中否我夢隨諸君側
身入戶牖覺來向空壁記君門前柳

唐堯心年丈重宴鹿鳴賀詩

桂苑當年觀國賓更逢鳩杖拜 恩綸南邦久溥行春化

先生歷任慶遠 東閣猶傳起草新 由鎮安府教 上壽科名

齊甲子高門文德聚星辰 家嗣道光庚子解元由軍功荐

貢咸豐乙卯舉人軍功保荐知府己未成進 無疆況喜堯

士季嗣由廩生候銓教諭太常寺博士銜

天覆好作華封祝 額舉行 萬壽 恩榜粵西是年倍

送洪幼元同年典試粵西

萬里融風草樹焦
新將玉尺趨征輶
蠻天厯厯清猿苦瘴
嶺駸駸匹馬驕
鐵網行收還浦月
錦衣歸送渡江燒
詞曹出使尋常事
已覺文星動九霄

對月有懷魯川

時客津門旬日矣

簷雨過無際
拋書倦舊課
皎月雲際來
清光入戶墮
露柯衆鳥靜
風竹一螢過
獨憶平生歡
遠道消塵堞
虛白湛此心
清景肯相左
應知方掩扉
鐙影對枯坐

同顧齋小飲市樓對雨

小樓清潯暑本亦在人境
坐臨對霽目萬緣與心靜
夕氣

日沈山過雲天漏影祁祁東復西併作將雨景殷雷七箸
失淒風欄檻冷沾衣不知遠燈火天街耿

登慈仁寺後山

竹徑橫翠微松門敞閑寂老僧此安禪卅載親開闢樹陰
風外動草色雨前積一鳥聲自聞幽泉韻相激絕壁啟疏
櫺遙山納深碧迢遞隱市闌橫縱辨阡陌暫忻囂塵遠復
快煩襟滌出岫望歸雲悠悠日沈夕

對雨感賦

砌草紛披積牆花倭髻開暑先微雨退涼近早秋來養拙
需長策憂時愧薄才疏慵成久慣三徑且蒿萊

退直東仲復

寸祿甯堪戀名山敢悔辭容身自朝市避地有書詩鼠印
塵牀迹蛛黏網戶絲宦游今已識漸喜少人知

寄懷朝鮮申琴泉

出門無羽翼言笑忽已久昨來文酒場春夢一回首異域
而同心八荒亦戶牖願言懋交修睽違復何有

連雨

溼雲低不飛自作連朝雨六月庭樹秋微涼動戶宇幽花
怪獨妍宿鳥時一語寸心隨散絲日夕千萬縷

六月二十一日歐公生日定甫丈招集寓齋拜公滁州宋

本遺像會者楊紉芸

寶臣

農部趙沅青

樹吉

給諫林穎

叔壽圖

侍御唐子藩魯川二太守顧齋庫部凡八人

五代文衰迫庸懦振興無人道已散波靡有宋歧康莊漸
逼荆榛作颺竄廬陵一老卓然起砥柱中流屹掀扞詞鋒
力與前賢角壇坫允爲百代冠門下濟濟蘇曾王賴公一
筏涉岸畔遂令述作侔漢唐如日麗天雲倬漢天下文章
莫大是優游況際寰海宴四十守滁紅浮頰空山流水閒
操纓當時稱翁壽者誰斯文八百載一旦王君大筆繼公
後一瓣心香手親薦盍簪磊砢多詞雄引鏡顛顛發慚汗
拜圖宛識天人姿署尾猶存晁李贊頻劫流傳公有神偉

貌疏髯森几案更經宸翰照星斗豈直遺文比圭瓚

圖有

李方叔晁悅之二贊
廟御製詩題其上

純

千載如對飲滌亭肅然令我思

魯殿從公更乞文字訣下學終身願仰鑽

彭生心和虞孫柏院讀書圖

我曾桃李蔭婆娑玉樹還欣受氣和開卷於今知學晚窺
園似子惜陰多風軒寂寂搖清影雲幌森森對浩歌不待
後凋蒼翠色著書莫漫歲時過

不寐

不寐亦成夢塵憂浩如積秋歸夜窗竹寒響爲撼慙浮生
今非昨拙宦心異迹仰屋寂無言蟲吟出深壁

與顧齋論詩

幽賞別有託眾趨安足貴閉門對古賢開卷萬蒼蔚千里
通夢想百代蠱腸胃源深有真瀾精積無勝氣大文在天
地綺靡焉詞費一笑謝糟粕醺醺味無味

夜坐口占

秋至不避人客衣自知冷孤吟怯夜寂眾籟亦悽靜檐竹
風螢流庭槐露鶴警感時物自喻街柝三商永

夢與顧齋同遊

流俗非我鄉遊方亦其內暫欣寤寐間同出天地大異馥
開雲巖遙音散風籟續紛萬影眩駁駘羣靈會拾月披塵

網探星解瑤佩鏘然金石奏眇矣鸞鶴隊謝我來途迷辭
君入世隘勺波飲滄溟卷石袖嵩岱寥廓一還往俄頃幾
人代揮手赤城標一鐙兀相對

古榆爲風雨所折歎同顧齋作

君不見白榆天上寒厯厯歲久星墮盤虬枝六月空庭暑
不到相傳二百年於茲風霆厯劫空心在天之所赦誰能
摧我來卜居喜當戶醉臥歌嘯酣淋漓炎暑無光晝色靜
清飆不隔宵聲遲朝晡遷坐就陰密縱有塵夢無由知何
言物極成悔吝神物破壁今其時深宵雨注飛蛟螭海倒
山奔萬車馳爪尾猶爭震雷怒鱗鬣歛隨驚電移朝來盤

根尙礧礧天宇蒼蒼看忽卑眼中不見舊兀突僮僕驚起
鄰翁疑長安春入五侯宅桃李滿園發華滋我儕婆娑笑
榆枋斯樂不畀誰所司嗟哉散木不才壽得全何術同支
離回看松竹未改色歲寒願保後凋姿

次韻答樊問青見贈

夢寐思求友心知好會難不辭炊玉桂長得證金蘭軒冕
收身早風塵倚劍看那堪鬚髭綠閉戶耐悲歡

送魯川之廬州太守任

車馬塞九衢朋儕豈云闕心趣弗我同庭除卽秦越鄉邦
日寥落風雅況銷歇君更南其轅期誰補余拙

郎署近卽載五十猶強仕君計豈云非我情獨難已論舊
多餘悲當歡亦暫喜千里去俄頃離憂自此始

曾公駐祁門軍威震南國江淮久凋殘田土半荆棘乘茲
剝復運坐使煙氛息報稱非一事撫綏太守職

京華春易晚良會歛數載亦知無留理往事成追悔淮南
攀桂枝薊北散秋籟陳書近百軸終欲冀津逮

秋懷八首

炎夏苦夜短秋至悲夜長寒鐙照不寐耿耿難爲光庭柯
一葉動萬象非故常浮生抱虛警令我思潁陽

初日不成曙疏雨猶殘滴靜耳多所憎淒聲亦出壁寸晷

馳百年家山夢中碧誰無世上懷偃息負松石

榮枯各有歸先後何能數萬綠強名之辭柯同一故薰猶
豈自別幽蛩爲哀訴葉落不上枝修名思早樹

蚩蚩羣氓子一飽無他求虛名誤來世白日坐自讎命運
寄通塞蘊此無窮憂甯知大造力自春還自秋

大道本夷直末路生險巇杯酒指天日醒醉還相疑傾擠
無坦步繫援有危基一羨與一憐悠悠豈多時

貴人方得志流俗焉是非平生事千百蹉跎惜多違豈不
念貧賤耳目久依稀誰能一寸地容此萬幽微

先我讀書人遠生古人後當其愁肝肺豈不思永久奈何

當吾世已先古人朽掩卷空歎息後亦如今否

天高晝氣肅彌日欺重陰酸風激地籟入耳無歡吟壯盛
爭遣此焉知遲暮心勿歎芳華晚悲秋非自今

月夜飲翔雲齋中

客心共明月一室洞八表靜夜闌生輝纖豪皆可了舉酒
林月上孤懷興之皎更吸杯底光詩腸轉清宵醉歸臥前
楹庭空天宇小

高麗銅鐘歌

家伯子所藏拓本

古花澀盡三韓土剝落殘紋隱圓乳流傳幾本到中華想
見當年奏矇瞽自從遼海浮陽襄考擊銘功典未亡金石

無情尙求野更誰攷古尋鏗鏘

揚州書生行 程君玉材名兆棟儀徵縣學生成豐三年

粵匪陷揚州闔戶自縊從死者八人 贈卹如例祀忠

義祠事詳魯川太守所爲傳

維揚城頭壤雲黑萬眾驚呼走失色膽氣付與書生豪一

笑性命輕鴻毛平生讀書賢聖伍清白肯污階下土八纒

纒纒懸當門指揮婦孺如一身吁嗟丈夫生世皆有死死

非其所死可鄙陰風獵獵梁上吹守土諸公會見此

題嚴孺人竹窗小草仲復同年屬作

國風有正變首冠皆婦人倫常正其始流譽播千春小雅

久不作大道日荆榛昂昂七尺子綺麗爭相珍卓哉白髮
陂形管揚高芬令德才不耀篇章況清新感激抒哀怨終
無俗湍磷豈惟深女誠更與傳經神至今羣子姓內外咸
彬彬三復梅花詠冰雪同磷峒

完貞伏虎圖爲翔雲題

四山月落林樹蒼颯颯夜嘯腥風狂雙眸睽睽臥當道利
爪磨齒人爲糧母負兒啼行走藏弱肉不敢容其鄉彼獸
其心曾莫測此獸其形安所防甯識精誠能感格山君頤
指如驅羊清晨萬夫愕且顧安居不失猶故常彼蠢旣馴
我靈服遂開田土勤畊桑怪事當年已詫絕奇聞異代尤

輝煌卽今才俊爭間出況有我友能文章披圖頽懦咸起
舞口歎筆頌流芬芳君不見雲夢之澤呱者誰於菟一穀
長發祥

顧齋將有楚北之行贈別

久分甘閒冷清時難陸沈遂令棄經笥不得戀朝簪以我
蹉跎志憐君遲暮心如何尙人役更作楚江吟
前詩意有未盡賦此再柬

弱歲志卓犖功期銘石室焉知二十年潦倒成無一君行
更寡聞誰爲箴遺失已矣復何言安茲留滯迹

幽蘭不擇地斤斧反有辭豈情異好惡投適非其宜寶鏡

迷五色得不同蓋厄高論況驚俗勿甯守唯唯
預計別離觴暫歡憂仍結豈乏新交游與言多秦越落葉
薊門霜孤帆夢澤月早歸勿淹留佳氣望京闕

枕上口占

久客親闈遠中年別緒紛疏鐙資少睡寒柝倦多聞葉落
風疑雨天高土作雲舊游俱不賤寂寞愧雄文

延樹南

煦

編修同年作試院煎茶圖扇贈蔣子良

彬蔚

編

修同年屬題次坡公韻

齊紈不動微風生拂拭驚作蚯蚓鳴是誰紗帽籠頭喫令
我一握神骨輕君不見延君墨妙今無二繪出坡仙詩中

意又不見蔣侯茶愛薑鹽煎常詔家近中泠泉消渴空慚
文喻蜀傾甌共歎紫餅玉此圖療渴莫療飢不辨仙掌與
壽眉鎖院誰致閣門井銚鑄而月徒相隨更當借取兩君
五色懷中筆寫我三人載酒相從呼飲時

秋闈分校畢作呈同校諸君

維太歲辛酉霜菊黃華薳三輔集珣玕四門闢紺閭樛材
當品目低首入垣舍襍被敢逸豫參坐誠苟且牀連筐箱
篋筍束槭梧櫝姓名糊甲乙句讀誤謄寫分青黃紫朱辨
焉哉乎也晝窗卷常披夜几筆仍把趨異爭注金刊方艱
合瓦鵠的或竊發雞肋未忍捨摸索昧恩怨棄取忘笑罵

衫悲昔年溼裳惜他人嫁所慮畫虎皮未聞雕龍鮓好古
時鉤深逞才易成霸高明蹈莽裂瑣屑因拾撫陳陳再而
三比比焉與馬說經家匡劉射策人董賈木斷已溝中桐
焦忽爨下慄劇鮎緣竿得難燕賀廈披吟月旣而言笑日
無暇一朝開丹鼎稍得聯酸竿柏臺羣彥粟私不容假
郭玉麓謝夢漁吳拙荈兩前輩官給諫
薛淮生董竹坡楊黼香三前輩官侍御祕監鳴一鶚賀雲
土宮寮聯二正蕭質齋贊善前七子欣同官杜蓮衢瑞睦
侍讀蔣子良夏蘭莊廷樹南歐四美慚方駕胡小蓮樞曹
陽用甫四編修鍾雨辰修撰前輩與謝鍾
歐陽三人均鼎甲官茶手自煎樺燭條頻炮僕倦驚觸屏
夏蔣延皆余同年吏頑喧咎履律變懷文無夢回憶宜樹啟戶晴嵐入卷簾

寒蟾射健翮一辭樊祥金遂出冶碌碌隨諸公媿余因人者

次韻答黃生

翦先

青雲足可至斫地悲王郎塞馬事反覆厯塊焉可忘懷璧豈自閔照乘方有光勿以一擊暫而思韜干將自我雖無憾撫情祇內傷

矮屋萃多士沈沈盡賢美游藝亦尋常終傷不伸指矧君荆楚材包匭同礪砥鐵網終當收沈沈碧海裏所愧罔象求負趨力荼菱從知非戰罪脫穎更今始

至日微雪

一雪斂冬威，歛隨微陽至。天公故計較妙手，慳初試人言。
老農占豐玉爲上，瑞還思變理才可坐同雲致。

殤女

柔枝不待春珠沈，夜泉閑永悲蟬聒。年已足一生事耳，寂
不聞啼目空。但有淚家人對沾巾，揮手疾走避。

病起雪夜定甫丈過訪

話久窗難夜，開門積雪深。甯辭終夕對，況豁故人心。短榻
鐙初盡，層城柝欲沈。應憐身伏枕，凍踏肯相尋。

紀事一百韻

維 嗣皇踐阼辛酉十月朔，賢聖作繼七乾坤。辨御六聯

珠集星躔合璧光
辰旭天與百神享
人歸九族睦
直聰明作后念終始
典學端拱撫華夷
闕門咨牧岳
舉善無遺賢
省刑不留獄
窮奇歎授首
朝廷一澄肅
霜霆互震滌
日月新櫛沐
文母佐十亂
家相咸二叔
再光中興業
一洗舊染俗
寬大詔頻頒
忠厚基更築
泚泚繼述美
翼翼夙夜勛

皇道彌正直
皇風益清淑
憶昨庚申秋
國步初反覆
禍首晉鄭依
王風變中谷
朋家作撫惡
顛趾負優渥
太阿一倒持
傅翼擅威福
清流務盡職
宵小婁升擢
貴賤劇趙孟
彼蒼易寒燠
澤竭網日密
民勞土日蹙
豈徒冠楚猴
忽欲指秦鹿
郊壘誰之恥
忍進鈞天樂
致令歌板蕩
不得同憂

辱驚波滄溟來瀕洞昏地軸豺虎走封畿蛟鼉起平陸太
白再經天熒惑不肯伏威弧罷張弩枉矢憂集屋烏上延
秋門倉皇夜避啄月黑憑城歎六師中野宿連營散秋葉
狼藉兵革粟眼見不得收兒戲寄帷幄百年備不用藉寇
無疑卜古有飛一箭今甯折一鏃豈聞骸可爨無復指可
劑遂使太平民展轉脫萬輻飛火通甘泉陰風動良嶽搶
攘終夜聲竭蹙三面祝猿鶴一怛化沙蟲萬出竊惜哉雲
西北悵矣月朧胸問誰致此繇人百身莫贖泣欲排雲謁
天遠萬重曲平生懷忠信設謂莫予毒九回一日腸千里
雙寸目憂來成內巖顛倒怪童僕性命甯關人排遣藉篇

牘時從馮與王日夕醉酈醪人事尙紛紜予醒安忍濁豈
效徑竇由而希岩穴躅余情固未傷余分亦云足亂離一
朝定關市罷酤榷輸金高邛山賜醢紛烹剝疇資和戎絳
終賴退秦燭一言同蘭臭連秀比筍束 列聖赫在天兆
億徧亭育鐘虞儼崇樹闡閭仍肩轂 國命靈長新羣公
容珞瑜存者幸遷延亡者惜顛仆奈何烏鴟輩睥目猶瞞
腹百計冀言售致禍恐不速誘衷莫假手何以鑒爾欲自
有師尹腸誰食伍參肉塞粟猶勤輓邊衣尙寄裘悠悠天
門遠慘慘雪霜酷招搖未回星榆柳忽改木地僻離彫羣
寵深怨詈篤連垣樹桃李比戶具貝玉捋鬚誰設問聖榻

莫爲逐況聞郿塢營丹楹而刻桷金紫耀輿臺風雷生掌
捥歟出夜半紙真爲誰能覺崩圯逃髯駕飛騰阻日輦惡
流豈盡海姦誅欲罄竹似厭王侯尊急登鄴獄錄寇木爭
自貴燎原方未撲屯餘端養蒙劍極肇敦復義馭俄再中
星占驗三瀆迅耳不及揜哺食豈待尊肩輿下檻車手笏
生桎梏面覲市朝湮魄驚鈇櫨觸佞血污霜刃臭骨點素
幅罄旬恩鳩孟肆衢快難卓始悔外生成不及早天極生
爲華堂貴死爲天下僇丕勞羞乃祖圯族愧世祿昔聞誅
國忠唐祚興巴蜀又聞排六姦宋運延鄆濮當時義士奮
聽熒斷未獨黽勉迫羣憤牽攀逼他族豈若隕自天聲色

無急促女中旣堯舜禁中更頗牧深謀剪凶慙聖鎮淨慘
黷流輝一下照四罪咸卒服反思初階戾內訌異瘳瘼省
括苟未審何能發中鵠嘗劇句踐膽生難燕國角明明

宗社神烈烈禎符籙行當落旄頭再與安鼎餽元和韓公

誦治安賈生哭

小臣

職載筆賡歌古人續

仲復惠水仙花索詩戲柬代謝

沅湘明月一千里錦瑟凝弦寄流水千秋喚起靈均魂泣

向西風化蘅芷東陽腰腹惜便便束素輕盈抵佩捐莫認

荆花邀曼碩且同寒菊薦坡仙

時將爲坡公作生日以此
花供之

仲復招集詠樓待雪未至願齋有詩代柬用坡公聚星堂

韻和作

狂飆十日走枯葉長安風多苦少雪窮巷臘殘深閉門羈
棲夢醒鎮愁絕故人得酒時余邀真率無勞東屢折井市
收聲夜色遠樓寒影亂鏗明滅射覆先愁蠟炬盡催詩不
待花牋掣顧我吟腸枯茁蕘看君醉眼光生纈痛飲沈沈
頽玉山雄談落落罪瓊屑轉惜天公未好事妙手回春客
一瞥乘舟儻許戴同訪淪茗還期餅再說更鬪新詠疾揮
豪腕底不及凍如鐵

歲莫書懷

羈旅長安日蕭條莫歲情投閒容薄宦留病伴浮生交契

誰當久文章或可鳴無成甘寂寞未是傲公卿

和顧齋除夕次坡公贈段屯田韻兼寄魯川

百年能幾何周甲倏云半無成益芥忤所志增蕙歎髫髻
迷翰墨歲時資惕玩匏悲不食繫櫟惜非才散務廣荒多
嬉索居勤少伴喪羊一失道覆鹿幾求且時過近自悔少
得親几案興寄寒蛩吟嘒嗤鳴蜩亂盍散聯三益積垢快
一盥卜鄰得馮王慰我衣帶緩結習力驅芟新知日講貫
勉勉踴寸勇悠悠謝尺懦於古殊鑿柄投時已冰炭尙念
淮南守天寒未舍館蹉跎歲已闌留滯杯重煖登樓幸共
賦獨對離家絮

十二月十九坡公生日願齋招集薛淮生

春黎

侍御同年

定甫丈穎叔海老翔雲仲復并余兄弟同拜公蘇齋遺
像拓本以山高月小水落石出分韻得出字

舫齋六月清陰密古貌追隨拜六一浮頰曾憶坡公言插
花壽舞爭芬苾爾時恨不從兩公眼見圖畫心若失當年
師弟去堂堂又繼蘇齋醉此日王君好古舫齋亞酷愛公
文飽篇帙官閒得酒能相覓更酌寒泉薦蕭瑟昔公生不
怨人厄豈果身無致主術一生磨蝎終同韓半世抱石甯
負畢迄今歲歲聯冠裳笠屐千秋映大筆憑君秉燭巡梅
喚起謫仙魂一樽酹公助我詩腸芒角出